

楞伽阿跋多羅寶經

卷一
之二

楞伽阿跋多羅寶經序

朝議大夫直龍圖閣權江淮荆浙等路制

置鹽礬兼發運副使上護軍賜紫金魚袋

蔣之奇撰

之奇嘗苦楞伽經難讀又難得善本會南都太子太保致政張公施此經而眉山蘇子瞻爲書而刻之板以爲金山常住金山長老佛印大師了元持以見寄之寄爲之言曰佛之所說經總十二部而其多至於五千卷方其正法流行之時人有聞半偈得一句而悟入者蓋不可爲量數至於像法末法之後去聖旣

遠人始溺於文字。有人海算沙之困。而於一真之體。乃漫不省解。於是有祖師出焉。直指人心。見性成佛。以爲教外別傳。於動容發語之頃。而上根利器之人。已目擊而得之矣。故雲門至於罵佛。而藥山至戒人不得讀經。皆此意也。由是去佛而謂之禪。離義而謂之玄。故學佛者必詆禪。而諱義者亦必宗玄。二家之徒更相非而不知其相爲用也。且禪者六度之一也。顧豈異於佛哉。之奇以爲禪。出於佛而玄出於義。不以佛廢禪。不以玄廢義。則其近之矣。冉求問聞斯行。諸孔子曰聞斯行之。子路問聞斯行。諸曰有父兄在。

如之何其聞斯行之求也退故進之由也兼人故退
之說豈有常哉救其偏而已學佛之敝至於溺經文
惑句義而人不體玄則言禪以救之學禪之敝至於
馳空言玩琦辯而人不了義則言佛以救之二者更
相救而佛法完矣昔達磨西來旣已傳心印於二祖
且云吾有楞伽經四卷亦用付汝卽是如來心地要
門令諸衆生開示悟入此亦佛與禪竝傳而玄與義
俱付也至五祖始易以金剛經傳授故六祖聞客讀
金剛經而問其所從來客云我從蘄州黃梅縣東五
祖山來五祖大師常勸僧俗但持金剛經卽自見性

成佛矣。則是持金剛經者始於五祖。故金剛以是盛行於世。而楞伽遂無傳焉。今之傳者寔自張公倡之。之奇過南都謁張公。親聞公說楞伽因緣。始張公自三司使翰林學士出守滁。一日入琅琊僧舍。見一經函發而視之。乃楞伽經也。恍然覺其前生之所書筆畫宛然。其殆神先受之甚明也。之奇聞羊叔子五歲時令乳母取所弄金環。乳母謂之汝初無是物。祐卽自詣鄰人李氏東垣。棗木中探得之。主人驚曰。此吾亡兒所失物也。云何持去。乳母具言之。知祐之前身爲李氏子也。白樂天始生七月。姆指之無兩字。雖試

百數不差。九歲諳識聲律。史氏以爲篤於才章。蓋天稟然而樂天。固自以爲宿習之緣矣。人之以是一真不滅之性。而死生去來於天地之間。其爲世數。雖折天下之草木以爲籌箸。不能算之矣。然以淪於死生。神識疲耗。不能復記。惟圓明不昧之人知焉。有如張公以高文大冊。再中制舉。登侍從。秉鈞軸。出入朝廷。逾四十年。風烈事業播人耳目。則其前身嘗爲大善知識。無足疑者。其能記憶前世之事。豈不謂信然哉。故因讀楞伽新經。而記其因緣於經之端云。

楞伽阿跋多羅寶經序

朝奉郎新差知登州軍州兼管內勸農事騎
都尉借緋蘇軾書

楞伽阿跋多羅寶經。先佛所說微妙第一。真實了義。
故謂之佛語心品。祖師達摩以付二祖曰。吾觀震旦
所有經教。惟楞伽四卷。可以印心。祖祖相授。以爲心
法。如醫之難經。句句皆理。字字皆法。後世達者神而
明之。如盤走珠。如珠走盤。無不可者。若出新意。而棄
舊學。以爲無用。非愚無知。則狂而已。近歲學者。各宗
其師。務從簡便。得一句一偈。自謂了證。至使婦人孺

子抵掌嬉笑。爭談禪悅。高者爲名。下者爲利。餘波末流。無所不至。而佛法微矣。譬如俚俗醫師。不由經論。直授方藥。以之療病。非不或中。至於遇病輒應。懸斷死生。則與知經學古者。不可同日語矣。世人徒見其有一至之功。或捷於古人。因謂難經不學而可。豈不誤哉。楞伽義趣幽眇。文字簡古。讀者或不能句。而况遺文以得義。忘義以了心者乎。此其所以寂寥於世。幾廢而僅存也。太子太保樂全先生張公安道。以廣大心。得清淨覺。慶歷中嘗爲滁州。至一僧舍。偶見此經。入手恍然。如獲舊物。開卷未終。夙障冰解。細視筆

畫。手迹宛然。悲喜太息。從是悟入。常以經首四偈發
明心要。軾遊於公之門三十年矣。今年二月過南都。
見公於私第。公時年七十九。幻滅都盡。惠光渾圓。而
軾亦老於憂患。百念灰冷。公以爲可教者。乃授此經。
且以錢三十萬。使印施於江淮間。而金山長老佛印
大師了元曰。印施有盡。若書而刻之。則無盡。軾乃爲
書之。而元使其侍者曉機。走錢塘求善工刻之板。遂
以爲金山常住。

元豐八年九月九日

楞伽阿跋多羅寶經卷第一

宋天竺三藏求那跋陀羅譯

一切佛語心品之一

如是我聞。一時佛住南海濱楞伽山頂。種種寶華以爲莊嚴。與大比丘僧及大菩薩衆俱。從彼種種異佛刹來。是諸菩薩摩訶薩。無量三昧自在之力。神通遊戲。大慧菩薩摩訶薩而爲上首。一切諸佛手灌其頂。自心現境界。善解其義。種種衆生。種種心色。無量度門。隨類普現。於五法自性識二種無我。究竟通達。爾時大慧菩薩與摩帝菩薩俱遊。一切諸佛刹土。承佛

神力從座而起。偏袒右肩。右膝著地。合掌恭敬。以偈讚佛。

世間離生滅 猶如虛空華 智不得有無

而興大悲心 一切法如幻 遠離於心識

智不得有無 而興大悲心 遠離於斷常

世間恆如夢 智不得有無 而興大悲心

知人法無我 煩惱及爾燄 常清淨無相

而興大悲心 一切無涅槃 無有涅槃佛

無有佛涅槃 遠離覺所覺 若有若無有

是二悉俱離 牟尼寂靜觀 是則遠離生

是名爲不取 今世後世淨

爾時大慧菩薩偈讚佛已。自說姓名。

我名爲大慧 通達於大乘 今以百八義

仰諮尊中上 世間解之士 聞彼所說偈

觀察一切衆 告諸佛子言 汝等諸佛子

今皆恣所問 我當爲汝說 自覺之境界

爾時大慧菩薩摩訶薩承佛所聽。頂禮佛足。合掌恭

敬。以偈問曰。

云何淨其念 云何念增長 云何見癡惑

云何惑增長 何故刹土化 相及諸外道

云何無受次 何故名無受 何故名佛子

解脫至何所 誰縛誰解脫 何等禪境界

云何有三乘 唯願為解說 緣起何所生

云何作所作 云何俱異說 云何為增長

云何無色定 及與滅正受 云何為想滅

何因從定覺 云何所作生 進去及持身

云何現分別 云何生諸地 破三有者誰

何處身云何 往生何所至 云何最勝子

何因得神通 及自在三昧 云何三昧心

最勝為我說 云何名為藏 云何意及識

云何生與滅

云何見已還

云何爲種性

非種及心量

云何建立相

及與非我義

云何無衆生

云何世俗說

云何爲斷見

及常見不生

云何佛外道

其相不相違

云何當來世

種種諸異部

云何空何因

云何剎那壞

云何胎藏生

云何世不動

何因如幻夢

及撻闍婆城

世間熱時燄

及與水月光

何因說覺支

及與菩提分

云何國土亂

云何作有見

云何不生滅

世如虛空華

云何覺世間

云何說離字

離妄想者誰 云何虛空譬 如實有幾種

幾波羅密心 何因度諸地 誰至無所受

何等二無我 云何爾燄淨 諸智有幾種

幾戒衆生性 誰生諸寶性 摩尼真珠等

誰生諸語言 衆生種種性 明處及伎術

誰之所顯示 伽陀有幾種 長頌及短句

成爲有幾種 云何名爲論 云何生飲食

及生諸愛欲 云何名爲王 轉輪及小王

云何守護國 諸天有幾種 云何名爲地

星宿及日月 解脫修行者 是各有幾種

弟子有幾種

云何阿闍黎

佛復有幾種

復有幾種生

魔及諸異學

彼各有幾種

自性及與心

彼復各幾種

云何施設量

唯願最勝說

云何空風雲

云何念聰明

云何爲林樹

云何爲蔓草

云何象馬鹿

云何而捕取

云何爲卑陋

何因而卑陋

云何六節攝

云何一闡提

男女及不男

斯皆云何生

云何修行退

云何修行生

禪師以何法

建立何等人

衆生生諸趣

何相何像類

云何爲財富

何因致財富

云何爲釋種 何因有釋種 云何甘蔗種

無上尊願說 云何長苦仙 彼云何教授

如來云何於 一切時刹現 種種名色類

最勝子圍繞 云何不食肉 云何制斷肉

食肉諸種類 何因故食肉 云何日月形

須彌及蓮華 師子勝相刹 側住覆世界

如因陀羅網 或悉諸珍寶 筵篋細腰鼓

狀種種諸華 或離日月光 如是等無量

云何爲化佛 云何報生佛 云何如如佛

云何智慧佛 云何於欲界 不成等正覺